

欽定全唐文

欽定全唐文卷二百四十九目錄

李嶠

八

攀龍臺碑

懿德太子哀冊文

欽定全唐文卷二百四十九

李嶠

八

攀龍臺碑

粵若太極始構氤氳含五氣之精元胎既分鼓舞立三才
之位由太朴而觀成象自流形而臻物備因乾坤之變化
相后辟之經綸則知肇創雲雷非一聖之事奄荒區夏由
浸昌之業是以岐鄧受命武王戢商野之戈譙毫開基文
后遷漢宮之鼎若乃提六合之樞紐扣二儀之鑄鑰日月
既出方利見於通三風雲未和尚勞謙於初九蓄宏圖於

緣鶴之邸垂慶緒於斷鼈之運屈伸應物而無累於時進退隨方而不違於道非聖人之睿智其孰能與於此乎大周無上孝明皇帝諱某字某太原文水人也其先出自周平王少子有文在其手曰武因以姓氏居沛之竹邑晉尚書僕射開府儀同三司薛侯陔其後也六代祖洽仕魏封於晉陽食采文水子孫因家焉夫其受氏中古開階上業軒轅以青龍進駕配永循機少昊以元鳥名官修方正度高辛之首戴干盾后棄之躬勤稼穡或四妃分孕隨肩執天下之圖或三聖連衡踵武司域中之契宗支繼明而襲

嘉帝載重熙而累洽雖七百休祚暫遷於質文而九五尊
名復光於厯數自非慶鍾長發神應遠期人鬼贊其謀猷
乾坤扶其統緒豈能出入百代周旋萬朞至道淳風未昏
而已旦洪鑪大寶旣舊而還新家纂迎日之符門傳配天
之業環三辰於斗極不足比其崇高灌四瀆於滄溟未能
傳其深遠若夫振氓育德屈道不王鳥奕於昭穆之間頡
頏於公卿之位蓋詳諸惇史可得而畧高祖成皇帝宏才
碩量經文緯武曾祖章敬皇帝達學通儒金聲玉振大父
昭安皇帝心冥道德志挾九區顯考文穆皇帝理會幾神

名高四海帝即文穆之第四子也母文穆皇后嘗祈晉祠
於水濱得文石一枚大如燕卵上有紫文成日月兩字異
而吞之其夕夢日入寢門光耀滿室已而懷孕遂產帝焉
及載誕之宵夢人稱唐叔虞者謂后曰余受命於帝保護
聖子驚寤而帝已生明日紫氣氛氳覆冒其城上俄而化
爲五色髮鬚若文綺之衣左右親賓莫不駭異及長龍顏
方面身長八尺背有黑子象北斗之形昔者禱於郊裸拾
卵而興王業游乎溫洛吞珠而立帝期一作基譙宮誕而青
氣發祥猗殿生而丹曦授彩亦有御蘭感夢皇天之命伯

儻翦葉開封上帝之名太叔咸躋未然之兆並獲將來之應猶不能比蹤神貺埒美聖符況乃龍顏武肩有含良之骨法戴鈐懷斗似高密之容狀是故生而聖知幼而聰達敏給於論天之始徇齊於對日之初甫及勝衣究緹絅之疇逮乎束髮殫輒悅之巧淳深孝悌之性闇發天機宏裕仁慈之風匪因師習太后嘗被重疾不愈經時帝扶侍起居品嘗藥物僅踰蒼舒稱象之歲未及子建誦詩之年履不正絢衣不解帶及丁荼蓼號慕嘔血七日無水漿之膳三年罷鹽酪之滋扶杖而行殆至毀滅雖孝文之服勤累

載高宗之諒陰三祀無以加也常有大節罕營小方志立功名而不求苟得心重氣俠而動循常憲道德深富規模宏遠曠心將江海齊逸宏量與宇宙同寬是以單父通人識其殊異之表大梁奇士許以霸王之畧文穆皇帝則哲之鑒恒易其難惟幾之神每前其用嘗從容謂諸子曰吾家累仁千祀積德重葉餘慶所及宜在子孫今觀汝曹悉王佐才也然草創經綸之際聖賢馳騁之秋騰嘯而馭風雲叱咤而成功業其在士穀耳以如天之聖用知子之明槩括所在錙銖不繆豈如趙邦謀嗣惟驗於藏寶楚國擇

材更憑於埋璧及文穆之棄代也帝廬於墓塋負土成墳
手植松柏喪紀之節復如居穆后之哀有芝草生於廬前
羣鳥數萬銜土集於墳上山中舊多猛獸行李艱阻至是
皆逃竄絕迹時人以爲純孝之感焉隋高祖雅聞帝名屢
加辟召友人同郡叔孫賀博通之士也陰陽術數無所不
該謂帝曰公狀貌非常但玉理一作埋未發耳終居人上勿
爲事先帝亦知隋統將終乃稱疾不應漢王諒以戚藩之
重作牧太原乃親率官僚造門致禮深加敦諭逼令進發

帝不得已起應明敷至仁壽宮屬隋文帝寢疾有勅館於

內史省以須後命帝高名宿望傾動當朝承風仰流揖拜無地衣冠如宗海之赴士庶均在田之覩司徒觀王雄左僕射楊素吏部尚書牛宏兵部尚書柳述咸與抗禮延登首席中郎之下迎王粲計吏之長揖袁逢千載風流復存斯舉帝風儀偉麗占對詳明朝端改容左右屬目雄等素欽才辯欲探闡奧爭出異同互興名理而洪鐘有虛受之量明鏡體不疲之德詞同炎輶應若扣機立定雌黃旣堪羸后前膝坐離堅白足使田巴杜口觀王旣特相欽慕牛宏亦深加敬異並虛心降節投分申交而楊素負才恥已

不若雖外示接引而內懷猜忌乃私謂觀王牛宏曰吾觀
武氏風骨實有英雄之度今太平無事安用此人不如除
之王等不答而柳述又潛遣相工視帝帝知之深不自安
會隋文帝崩因移病出外素等以爲僞迹從此欲搆禍端
賴觀王牛宏營護得免漢高以英威冠代取忌范增劉主
以倜儻出羣見疑曹操比方前事有若合符帝旣脫網羅
深自隱匿雖室家追訪猶見碭山之雲而塵里去還不就
丹陵之日辭杜城之弋獵罷雷澤之漁釣獨覽前志長懷
古人有行高於時有行濟於物輒慷慨擊節殷勤留想便

欲冥道契於一朝託神交於千載墳築唱和自多踰萼之親風景遊遨無乏林泉之興歲將晏也龍蟠鳳戢者久之大業七年煬帝徵天下精兵會於涿鹿將親授節鉞以伐遼左旌旗亘於千里轉運盈於萬軸閭閻失業郡縣不安帝謂諸兄曰夷狄不賓肇於上古自當置之度外耳未有紓萬乘而讐小忿擾羣生而赴非急夫兵猶火也不戢自焚禍亂之萌從此始矣既而六師魚潰九野鴻飛竟兆天亡之徵卒成土崩之勢帝於是慨然有志方思濡足乃討論兵法商榷將率上自黃帝下訖有隋考其謀畧機權稽

其成敗得失並列名氏爲之贊論殫魚鈴武韜之術究元女黃公之符勒成一家凡三十卷名曰古今兵要制高秦肆事軼魯門可以刻祕牒而昇廟堂可以藏名山而懸日月聖人之心情見矣天下之能事備矣于時兵戈屢擾饑餧荐臻英傑懷逐鹿之心氓黎有瞻烏之懼期謝公之出處以卜興衰待韓王之從就而論勝負與能之託時議攸歸長吏猜焉數令相覘帝自惟人望懼發禍機欲混迹而同塵且韜光而向晦乃出應期命爲河北道總管府司騎參軍智周變通道兼語默戢大鵬之舉遂集榆枋降應龍

之神還游陷穿楊元感之作亂也後主方重討遼東元感進圍洛陽官兵頻戰不利城中大駭議欲出降時帝在東都懼其失計遽往見留守樊子蓋爲陳用兵形勢制敵權宜論元感必敗之徵說都城可守之策子蓋大悅拜而從之爾後軍謀一皆諮稟卒擒元感帝之力焉後主歸自遼陽子蓋方之行所邀帝同發擬相推薦帝知後主猜忌不願多取功名深自謙撝發言懇到子蓋心悟歎息而罷於是汎以軍功奏授正議大夫遷晉陽宮留守司鎧參軍無忌之克敵讓封仲連之立功辭位比我休德曾何足云帝

既博通羣書兼善衆術拂龜端策未勞詢於詹尹推厯考
度無假訪於山稽大業十二年後主幸江都宮帝私謂諸
兄曰此行也不復還矣繇是鄉里宗族勸帝起義帝每自
推算知時命未符又念叔孫賀之言故抑而不許初李密
爲楊元感謀主元感不能從及聞帝與樊子蓋運籌所揣
皆如密意乃歎曰天下奇才也遂遣書招帝帝笑而不從
諸兄素聞密名勸帝帝曰密雖有才氣未能經遠欲圖功
業終恐無成會唐高祖安撫太原便留鎮守帝觀之曰雄
傑簡易聰明神武此可與從事矣投刺往謁焉賈文和之

揣君酈食其之觀將翔而後集可謂明也高祖亦虛心結契握手推誠周文之得姜牙載以駢服成湯之逢伊尹告之宗廟便應爪牙之任即承心膂之託高陽賊厯山飛來寇帝從高祖擊之弧彎六鈞箭穿七札隨手必陷當皆靡亂神兵掩擊魄虜大殲熊山之破赤眉不比其捷犬邑之摧青犧未儔其儕高祖嗟嘆賞賜甚多軍師凱旋便過帝宅樂飲經宿恩情逾重其後數過輒宿遂以爲常帝嘗夜行聞有稱唐公爲天子者登遣尋索了無其人又夢從高祖乘馬登天俱以手捫日月於是具以狀白并獻所撰兵

書高祖大歡益以自負置其書於箱篋後皆按以從事聞
程昱之夢即以爲名聽張良之言皆納其策所謂天授豈
但人謀高祖將舉義兵令帝領徒於城內義旗建授中郎
將兼司鎧參軍陪斬木之經始奉披荆之繙構異中涓之
受職同別校之分麾從破呂州進授右光祿師至霍邑隋
將宋老生發兵拒險軍不得進羣下多請引還者高祖將
從之帝直入切諫高祖乃止決機於龍鬪之日定策於狐
疑之辰笑禪謐之請車同子房之借箸實建王業事符天
啟霍邑定拜壽陽縣開國公食邑一千戶屠城斬邑旣憑

帷幄之謀開國承家即啟山河之賦京師平遷光祿大夫
賜宅一區錢三百萬綵五千段灌嬰之頻從征伐始拜大
夫去病之累著勲庸方開甲第釋干戈而論俎豆起桴鼓
而立君臣式是禮儀允歸通博義寧元年拜禮部侍郎餘
如故儀刑斯在命服有輝肅事南宮雖懋於春典司言東
掖更資於夕拜遷黃門侍郎餘並如故職參持蓋位連負
璽茂先之博覽圖籍譽滿玉堂務伯之提正綱維名高瑣
闈錄前後功效改封義原郡開國公增邑一千戶賜良馬
二百匹粟萬石爰膺嘉賞遂啟大邦解漢皇之

此字一無

驥寧比其惠分吳主之粟未齊其寵武德元年拜內史令
帝累讓不受改授納言又固辭乃授上柱國金紫光祿大
夫散騎常侍同中書門下三品兼檢校并越將軍賜田三
百頃奴婢三百人綵物二萬段黃金五百斤別食實封五
百戶金章紫綬玉鼎黃扉柱國齊元相之班將軍比命卿
之服膺上賞而平軍國坐中樞而議文武恩榮兼被時輩
莫儔三年拜工部尚書餘並如故差肩八座配象七星以
百揆之樞衡參萬機之損益德績兼備聲望日隆于時軍
旅猶殷憲章未洽帝盡心翼亮推誠匡輔入有造膝之謀

外宏匪躬之義興復乎九疇之敘彌綸乎百度之闢
所以克振令典於是畢修高祖閼一作字之禮絕羣彥進封應

一作晉國公加實封八百戶餘並如故高祖又謂帝曰朕在

并州之日恒往卿家今欲使卿一門三公用微答主人之

意也是日封帝長兄司農卿士稜爲宣城郡公次兄行臺

左丞相士逸爲安陸郡公並食邑一千戶歡比連席之舊

契均同舍之游酬德踰於二錢報恩過於一筭闔門受邑

寧惟吳漢之子孫舉宗畢侯豈直蕭何之兄弟爾後高祖

行幸常令帝總留臺事兼知南北牙兵馬判六曹尚書相

國之處秦中蓋資鎮撫令君之住許下仍參籌畫具瞻惟允是謂國鈞時帝先缺中闡高祖親爲求偶謂帝曰隋納言遂寧公楊達才爲英傑地則膏腴今有女賢明可以輔德秦晉之匹不能加也於是特降綸言俾成姻對高祖自爲帝婚主遣桂陽公主專知女家降六禮於璿樞指三星於金穴魯大夫之嫁女卿士送迎張公子之取妻乘輿供帳作儼於鳳凰之兆相從於孔雀之樓伐柯則歡其食魚流荇則美其巢鵠是配琴瑟爰宜室家欽若有行即孝明高皇后妃也始同媯水之聘終啟塗山之業永言好合若

有神靈之契焉憫彼塗泥實惟淮海襟帶全楚咽喉勁越雖孫權故業久黜霸圖而劉濞餘妖仍多反氣杜伏威初行僭逆輔公祏繼以亂亡泉藪未懲萑蒲猶在帝思俾乂遂紓時哲以本官權檢校揚州大都督府長史賜錦袍寶帶一具爾乃撫之以誠恕經之以權畧鈞距閭施旣問羊而知馬網羅潛設亦因魚而得鴻降北海之渠未踰期月盡一作
剏南山之盜詎假旬時然後商旅安行農桑野次化被三吳之俗咸行百越之境轔軒符節之使復下於蠻陬齒革羽毛之琛還輸於王國矣始高祖之餞帝也期以半

年及江湖既平帝將入觀父老數百人詣闕上表乞更留
一年頽川之還借寇恂臨淮之重祈侯霸傳功語德彼獨
何人璽書褒焉復留鎮撫九年太宗以儲宮統事乃徵帝
入朝寵賜頻繁事以殊禮荆河奧壤密邇瀍洛自昔股肱
之郡由來戰爭之場飛水初澄雖免鯨吞之患叢祠未翦
尚有狐鳴之妖受委共康非賢勿授使持節豫息舒道等
四州諸軍事豫州都督賜黃金二百斤朱幡首途吏人抃
舞而交謁阜蓋臨府盜賊驚惶而請命傾巢咸附闔境肅
然棄戟捐矛旣如張霸之政術含哺鼓腹更似岑熙之歌

詠利州都督義安郡王孝常稱亂劍南扇動夷落孝常誅
死餘黨分竄劫掠未息朝廷患之太宗博訪羣寮咸以爲
非帝不可貞觀元年拜利隆始靜西龍等六州諸軍事利
州都督郡惟遐徼地實偏陬尋蜀帝新開之途經漢主舊
燒之棧渝人賓旅獸駭禽驚帝招輯叛亡撫循老弱賑其
匱乏開其降首百城橐弓而不用羣盜束手而來歸宏以
善貸之恩赦其既然之罪未移弦望郡境乂安制書褒揚
增邑五百戶賜珍物服玩黃次公政稱長者裂壤開封杜
伯侯動無間然賜書增秩五年改授荆峽澧朗岳果松等

七州諸軍事荊州大都督眷茲上流實惟舊楚接荆臺之
跨跱連渚宮之形勝一都之會昔號難治帝仁化久覃威
名先著褰帷而十部咸肅閉閣而萬殊皆理寬力役之事
急農桑之業猶圖空而京坻實姦回息而禮義興市不倚
門田多讓畔烝人罷訟詠河上之甘棠游女無思歌漢濱
之喬木流化實同於二陝宣風寧止於六條先是微屬亢
陽頗傷時稼帝乃親往長沙寺迎阿育王像而祈焉俄而
油雲勃興大雨洪澍倏忽而四境滂霈須臾而千里霑洽
申虔未踰於晷刻降福遄同於影響一州歎駭稱有神明

是知元符未臻且列於公侯之位帝道潛契實冥於天地
之德昔者姬文事紂行化始自於江沱晉武平吳樹勲實
由於荆土誠作霸之基址乃興王之窟宅況復風烟氣色
樓臺邇翔鳳之川邑里光輝阡陌通臥龍之境爰紓不世
之主將建非常之業於是乎百物呈瑞三靈降休游殷朝
之白狼止鄧尹之丹爵舍牙之獸遁迹於殊鄰同穎之禾
垂苗於近甸惠愛之德著矣皇王之迹兆矣然後白氣流
而聖人感黃河清而聖人生奄有六宮遂荒三象化千乘
而爲萬國撫四海而成一家起藩屏之會昌致寰瀛之景

福大矣哉九年唐高祖崩帝奉諱號慟因以成疾太宗遣
名醫診療道路相望醫以病候將深勸令進藥帝因舉聲
大哭嘔血而崩敬想忠義之風緬惟臣主之分求諸古昔
未之聞也時年五十九遺令歸葬文水因山爲墳穿足容
棺斂以時服灞陵之不藏金寶紀市之無變塵肆惟聖達
節千載同風於是具僚失圖闔境哀慟農商號於野士女
哭於衢三月停竽瑟之音再期深考妣之慕寧止東城故
老安歌對陳氏之祠復見南峴吏人垂涕望羊公之碣太
宗聞帝崩狀嗟悼久之曰可謂忠孝之士乃命史官書之

追贈禮部尚書配食太上皇廟贈物八百段米粟八百石
官造靈輦送達故鄉仍委本州大都督英國公李勣監護
喪事緣喪所須並令官給遣郎中一人馳驛弔祭謚曰忠
孝公禮也天皇大帝嗣膺乾厯光闡帝猷思盛德而有懷
念元功而載併永徽元年改贈使持節都督并汾慈嵐四
州諸軍事并州大都督餘並如故聖上肇開陰曜正位坤
元永徽六年又下制贈司空餘如故顯慶元年又贈司徒
改封周國公食邑四千戶咸亨元年贈太尉兼太子太師
太原郡王食邑五千戶以文水三百戶充奉陵邑置令丞

已下官夫源流廣而津派長枝葉繁而本根茂況立德之
祀奄百代而全昌謀孫之基冠千齡而首出與夫東漢外
戚西京異姓不同年而語矣文明元年皇帝臨朝追崇爲
魏王食邑一萬戶永昌元年羣臣以名號不稱抗表固請
於是上尊號曰忠孝太一作大皇及鐘石變聲謳歌有奉皇
帝欽受終之茂躅御惟新之景命改正朔而營宗廟定郊
邱而立社稷聿遵故實光啟鴻名乃奉冊尊太皇爲孝明
高皇帝陵曰昊陵廟曰太祖推大功而增大號奉先之義
存焉享皇極而配皇天敬始之誠備矣仍以爲千人起邑

名未光於寢園萬戶陪陵班僅齊於令長思廣崇陽之稱
更增奉明之秩聖歷二年乃下制改昊陵署爲攀龍臺加
置官屬佐吏灤水將九河齊濬橋山與四岳爭高然後肅
敬之儀旁絕於恒數尊崇之志上申於罔極蓋天子之孝
也庸小人之可談乎初晉陽懿公旣受田於文水有紫氣
發於其地上衝太微占者以爲當有聖人興於此邦至是
而天下宗周符於所占矣帝神氣和雅天姿英邁率爾坦
易而無廢務儼然威容實可親昵俾好賢而樂善博識而
多聞游談者空慕其風鑽仰者不知其度若乃觀文察理

觀奧鉤深推六畫而見三才覆四營而窮萬象斯乃風皇之所以際天人也敦本抑末納祜蠲邪探祕術於九門致成功於六府斯乃火帝之所以慈氓庶也語奇正縱橫之術論帝王仁義之兵教軀武熊羆作舟車器械斯乃軒后之所以張武功也溫良濬哲惇懿文明觀象乎藻火之衣聽言於宮商之律斯乃媯水之所以昭文德也聲爲律而身爲度勤於國而匱於家沐雨而櫛風卑宮而菲食斯乃夏王之所以求諸己也引罪讓德持尊下卑虛襟於藥石之言屈體於芻蕘之議斯乃商后之所以聽於人也不傲

不逸多藝多才求賢審官興法立度通刑政之要達禮樂
之情斯乃周公之所以勤王事也宮牆卑測性道難間筆
削所裁羣賢無措言之地憲章所綴百代成不刊之式斯
乃孔宣父之所以正人倫也兼列聖之純懿總百王之事
業時運未集東臯輶鴻鵠之心天衢旣亨北面就人臣之
禮似文命之匡虞歷都君之輔唐政終能與時俯仰隨運
汎隆居位恒屈其身益官必行其道是以參謀帷幄則消
薄蝕而殞攬捨助理鹽梅則成雍熙而作舟楫名裕於八
能之士德高於五聖之臣及賜瑞分珪牧州典郡其人變

而衆化其政賢而羣美入稱來晚謳歌迎節傳之車出有
去思號泣擁旛帷之路豈惟南征而北怨固亦西泣而東
悲仁覃於雞犬之鄉澤浸於蟻巿之穴用能摛光表之盛
業啟格天之洪緒存膺顯位形弓開九命之尊沒享大名
紫籙登萬乘之貴豈非天道人事祐賢福善之徵歟皇帝
念過隙之不留哀終天之早報欽致孝之前轍仰增名之
舊式以爲廟堂作頌功業纔播於朱絲簡書策勲德音不
傳於翠玉將謀相質之事更宏丕顯之躅載紓中旨爰命
下臣考泗水之遺風求弇山之故事奉天經而揚詞藻圖

帝範而懸金石將使神功睿業配圖象而昭臨茂烈崇徽
共方儀而永久跪承大命而爲頌曰

厥初剖判肇有君臣體國經野司天屬人二微遞襲五運
相因惟德是輔惟乾罔親其謙莊斯崇荒侈則替金鏡易

失玉儀難繼於皇聖周獨與神契受籩千祀重光百世

其二

軒謝摯立辛遷稷升岐山光啟鄧水丕承淳耀中缺靈符

更興三才奄有八景時乘其三方隆慶基誕生睿德齊聖剛

毅欽明柔克行爲天經語成帝則文冠楊史學窮儒墨

其四

傀俛三聘觀光九重未交劉徹先揖袁逢路險難進才高

不容言辭吠犬退保潛龍

其五

人忌英雄物疵孤直隨運出

處與時消息遂汨泥沙爰栖枳棘擇木候主搏風舉翼

其六

披荆晉野借箸汾折霍邑通路秦關啟扉策無遺兆慮必

先機漢主分食蕭王解衣

其七

裂壤疇庸升朝致績勲刻彝

鼎任司衡石玉鉉調梅金壇秉戚職備文武道光帷

其八

幕中臺

恩洎同胞禮加內主魚貫納幣鴈行分土外館施衿

其九

三事出牧九卿爲守憂人急

曳組榮被親戚慶隆今古

其十

九事出牧九卿爲守憂人急

才屈道資祐淮水臥汲頽川借寇冀遂買牛宋均浮獸

其十一

荆吳異俗梁豫殊鄉德績均被椒蘭共芳歌迎來軸泣送

歸艎朝禮斯懋宸心孔臧

其十 堯得聖臣納諸大麓舜讓

才子止其枝下況我皇明兼而輯櫝徒屆時命罔終天祿

其十 戢耀南紀遷神北維二分齊德三馬同基漢曲圖像

江沱立祠存流美化沒

其十 没有餘思

欽若大君奄荒天位

率由禮樂仰尊名器禋郊展禮升壇立謚祇敬已洽孝思

無匱

其十 四 衣冠軫慕園寢加隆裸擇殷士歌留沛童弇山

垂裕濟水銘功流德音乎翠玉配貞觀於元穹

其十 五

懿德太子哀冊文

維神龍二年歲次景午夏四月甲戌朔二十三日景申懿

德太子梓宮啟自洛邑將陪窆於乾陵禮也廢衣夕陳祖
奠朝設蜃輶俄軫龍旗按節皇帝嗟蟻庭之寢籥惜鳳渚
之韜簧撫萬乘而懷國本綏六姻而悼乾將情無輟哀禮
有加數刻純懿乎金版播聲芳於玉裕其詞曰

靈命將興元符是膺皇基茂立帝武丕承祥集畫堂慶流
朱邸棘矢延貺桐圭備禮實惟天族載挺人英川寶岳秀
虹輝電精舞象得元佩觴聞道刻舟敏遽牽衣慧早幾神
闇體理識冥資心韜鍾律情含蔡蓍曰仁曰孝非訓非師
寬惠深博溫良肅祗苞舉六爻網羅羣籍詩接楚彥賦延

梁客淮國傳驩雲臺對易樂善超輩多才掩昔乃崇匡衛
實屏實藩乃列朝請爲鴻爲鶴揚聲北路振彩西園儀表
姬戚光輝舜門恭事闔闈歡迎黨族怡色玉潤溫詞蘭馥
中外克諧親疎允睦恒德有裕閒言無謗榮深出幸寵茂
留中婉夔羣辟綱繆二宮陪輿澤厚賜馬恩隆西蜀欽義
南山向風禮縕天孫望高元嗣重海闊象前星虛位方輶
頌彝行膺主器奄喪門軸俄催隙駟嗚呼哀哉鳳下朝陽
龍收暝光瓊田滅彩桂苑淪芳國軫傾翰朝悲壞梁惟靈
徵之寂寂怨天道之茫茫嗚呼哀哉元聖登朝恩榮下貴

爰命典冊式昭名謚匕鬯雖崇粢盛不蒞闔壤同戚具寮
增歎嗚呼哀哉築思臺兮竟不旋還作室兮復何年訪來
人兮傷對日瞻去鶴兮感昇天惜明離之虛繇悵風樂之
徒懸懟銀牋之留月泣銅樓之送煙嗚呼哀哉司兆獻占
掌圖辨域挽鐸初驚帷幌旣飭引文衛之逶迤度繁笳之
悽惻纏永慕於青府結餘酸於紫極嗚呼哀哉辭交風之
近甸出避雨之層巒望八水而遙集懷三川而顧歎麥枯
今夏旱花落兮春殘林野晦而天無色烟雲愁而景欲寒
嗚呼哀哉稅駕昭途即官下土執斧供事揚麾按部藏日

兮山門埋鐙兮地戶痛平生兮冥冥哀倏忽兮今古視不見兮呼不聞天無曉兮夜無分同變化兮光陰盡配陽秋兮蘭菊芬鳴呼哀哉

欽定全唐文卷二百五十目錄

蘇頌

長樂花賦并序

封東嶽朝覲頌并序

授張說中書令制

授劉幽求左僕射制

授劉幽求同中書門下三品制

授王仁皎開府儀同三司制

授阿史那承獻特進制

授姚崇兼紫微令制

授李林甫特進制

授崔日用黃門侍郎制

授張廷珪黃門侍郎制

授薛稷中書侍郎制

授解琬左散騎常侍制

授褚無量右散騎常侍制

授王晙左散騎常侍制

授于經野給事中制

授李懷讓給事中制

授柳渙給事中制

授薛稷諫議大夫制

授吳兢諫議大夫制

授鄭勑紫微舍人等制

授崔琳紫微舍人制

授王邱紫微舍人制

授齊澣紫微舍人制

授韓休起居郎制

授賀知章起居郎制

授洪子輿起居舍人制

授崔銑起居舍人制

授許景先左補闕等制

授梁昇卿等拾遺制

授韋元珪通事舍人制

授韋振通事舍人制

授劉知柔尚書右丞制

授源乾曜等尚書右丞等制

授張仁愿兵部尚書制

授畢構戶部尚書制

授李乂刑部尚書制

授劉知柔工部尚書制

欽定全唐文卷二百五十

蘇頲

頲字廷碩宰相瓌子舉進士拜中書舍人知制誥景雲中
襲爵許國公開元四年遷紫微侍郎同紫微黃門平章事
八年罷爲禮部尚書檢校益州大都督府長史開元十五
年卒年五十八贈尚書右丞謚曰文憲

長樂花賦

并序

蜀太守庭際有紫華草秋中始繁英露洗冬早尚直本霜
封蕪雜大同於衆卉盛衰小異於羣物余訝而未識吏或

告余曰此長虞所賦蜀長樂花也故心暗賞焉因口授書
吏遂墨而成作恨不見古人所爲得髣髴其旨爾

夫長者以短長之形度其長則至美夫樂者以哀樂之類
同其樂則至喜長也樂也吾安得而間之嘉纖植之並用
偉令名兮在茲徒見其豐族苯孽高標璀璨莖丹外而縞
中葉縹分以紅貫綴綠穎之重疊索紫蕤之爛漫迫而象
之君子其常或微或章聳危冠兮纓若綬默退靜其何望
遠以意之佳人欲翔炫煌煌重羅綺兮撲搖翠簾來思
而未嘗匪以幽兮自直匪以直兮自藏匪以晚兮自耀匪

以耀兮自強文濁露之均灑庇清舒之汎光本無嫌於散
地甘有寓於殊方然則太波初滿上林新霽華苜灼爍萬
品千計搖瑞色而函芝雜奇葩而轉蕙孰與夫玉堂金閣
之偏賞白日青春之特麗歲不與兮時向闌風蕭蕭兮夜
漫漫賓遠鴻於沙塞叫離鶴於江干君曾不見三月華矣
盡林間之槁木千霜隕矣亦庭下之枯蘭懿此常度陵於
早寒假春期而不彩雖秋令而不殘衝雨霰之飛薄任雲
山之險難芳弗珍於霍靡節常慕於檀櫟吾則知樹背之
奚託惟傾心之可安如後凋之是貴罔獨立其誰觀文學

錄起而爲亂曰白露瀼瀼何草不黃紫華灼灼生君之堂
彼不伐兮秋自翳時或珍兮君是惠彤庭赫兮朱草駢交
屈軼兮友賓連伊榛莽而荒些君曷爲兮賦旃

封東嶽朝覲頌

并序

封祀之山五在中國泰嶽首之昊穹之命再集巨唐皇帝
受之臨位十四年考虞氏歲巡之義頌周王時邁之什十
月辛酉步自有洛十一月戊戌帳殿齋於岳趾淵默以清
繹思而照將紀功布度順斗承天精享也己丑宏觀軼區
宇盛儀振開闢高臨建鳳萬隊張皇以燭山上御飛龍百

神翕習以扶道國台二藩后四髦士密侍信臣高位扈封
臺列升陞不下五十以聖言沖邈瑤牒寶書誓之旨曰朕
獲守丕業恐不克駿命惟上帝儲休錫蒼生無疆之慶朕
之慶也古則祕之何哉屬寒馳迅飈露清終夕若掃若鋤
晏然而已庚寅天官次籲王制協時嚴高祖以配之嗣高
宗以陟之冕裘立珪璧序潔罍俎調鐘呂倨勾於簾簾戛
擊乎柷敔寶駢瑞兮物焜煌空薄霄兮音容與則纖塵不
動和氣充塞日在於觀天爲之門揚日大光謂小天下昭
以抱戴見之卿靄郁郁紛紛喜氣絅縕當芝檢引紫薰大

紫洞而三辰接鬱蒼搖而萬歲聞自下達上溪吾君君之
來兮望如雲端兮眸聖之門至尊辛卯有事於社首以泰
折如泰壇於穆我睿宗侑而作主奠獻嗚咽天子之孝也
僉以金匱歸助於祖禰石礮藏美於乾坤戒咸秩則司存
癸巳載大旂合大樂三陔倨以帷抗四亞鏘而輶止朝羣
牧揆千官底邦賦數庭實華蟲辨等車馬來觀周人隨人
二王之賓戎狄蠻貊萬里重譯必拱于著執贊奉璋雍雍
昂昂靡敢怠遑乃建鷄竿伐鼃鼓帝命出皇恩溥揚翼風
作解雨施舍之蕩滌之宥法罪除頗穎湧湧洋溢周流暨

霸不崇朝而遍者與此山俱疇翳而不拔胡微而不鋪也
亦既稱壽申命宗伯咨爾頌焉效古之刻石臣頌稽首再
拜而言曰臣聞昔在帝堯臣惟咎繇聰明之謂聖邁種之
謂德天若曰依於巨唐易姓者李王於中華崇功者唐聖
之澤德之浸也我唐祚之興昌符誕膺兩儀動六葉承皇
帝宣高祖四宗之景烈肇開元神武之明號廣矣大矣莫
有不寧罔有不俾咸一德之輔不貳心之臣羣后抗詞曰
臣聞先王因天事天因地事地因名山升中於天陛下得
天之經得地之義得人之行行也者孝莫大焉兼三才以

爲政孝也者仁莫大焉含萬物以爲性今三才貞萬物亨六典平九功成官不滔獄不放至於刑清良有以也因斯而談清明在躬志氣如神之睿者君也四國于藩四方于宣之美者臣也有物有則我君臣保乂之原所由于前設其教于後余往歲邦危中否天討內難陛下提三尺之劍猶闔閭絕勾陳趨北軍正北辰然後翼翼乾乾尊尊親親立我蒸人聖考所以付天下之公器蹈汾陽之清塵唐雖舊邦其命維新古者振兵釋旅祠土祈穀先事也我是以幸太原祭汾睢耀金甲肅邊鄙虜馬讐而不敢南向解嚴

京師獲寶鼎獻宗廟成人歸而盡務東作報福京城於是
乎爰佐五畤郊天以奉時爰崇九室祫祖而敬思昭格遲
遲神人允釐無何籍三春盛六穗不召斯至擁休之類如
山則委曷月而祕豈非享物降嘉司火也立渾同度在璿
也陛下姑謂之薄臣所未諭且管氏詫齊帝王凡八十九
涇淪鬱沒孰若致美我高宗勒岱甲子正六十肸纘歲蕤
故能應期我神武惟繼代奉業增高保鴻缺乎中何也即
先后以權暫阻於運二宗紹復未遑厥功神闔之契不在
諸子而當聖躬固不可辭者審矣帝曰俞畏德之不稱而

左輔右弼雜縉紳鴻碩之倫抱蘊懷書蒸雲吐霧方集賢
內殿講議前席以論之傳不云乎君子勤禮敬之至也易
不云乎先王作樂豫以動也慎矣哉禮樂之爲用故執禮
者具刪弊則質宜之自我變樂者理去商何害謙以爲臣
二者洽而三讓之制曰可始嚴鹵簿騰七萃啟禁闈迴九
重以聽乎鸞聲之雍雍匪疾匪徐物有其容動植讚華夷
觀駢闐總樽羨漫半散出成皋踰滎波憑滑臺眺洪河遂
並昆吾之墟徜徉乎大舜之澤瀨四瀆二濟入於兗經九
一三齊喬于岱推二旬有六而頓行在莫不皤皤華皓如

藿傾陽或牽以餼或捧之觴區儻乎康莊一以伸神武之
今日一以感乾封之舊章迺餼歸之觴舉之慈且惠而與
之驩沸渭頡頏矧國鄒魯家洙泗乘汶野而圖記可知指
泮林而頌聲不墜以周公之故將孔子之後翹然希王者
之屬車聖人之清蹕則久及信宿之意巖巖所瞻宗神曰
天齊王加一等於三事戶二十供王祀環十里禁人樵報
也大禋旅之數重褒成之祿撫遺毗賜之復帝曰吁夫艱
難繫王業休咎牽人事況天監之殊祥也殊典也不自滿
而虔鞏於位朕寶臣曰乾曜洎說有初有終時乃風欽哉

汝作朕左右丞相醫汝忠益以嘉猷補袞之闕罔或怠遂
宏天封煥天章篆介邱而旋德陽大饗乎羣方程後代美
其律聲其實墳作四而籍言七也臣頫不敏繼伯夷之直
清微太史之留滯聆金奏同百獸之舞振木鐸採萬人之
詩敢陳詩以頌曰

天子聖兮天孫崇登以封兮報以功受命再惟皇代天之
賚人所載士馬山橐戈矛山沓禎符山雜靈響山答天與
人合我鋪衍兮長粹清太元冊兮太乙精休光光我之慶
成舜四朝而禹萬國莫之我京

授張說中書令制

門下咸有其德委廊廟之元宰知無不爲歸掖垣之成務
銀青光祿大夫檢校中書令上柱國燕國公張說含和育
粹特表人師懸解精通見期王佐立言布文武之用定策
勵忠公之典才冠代而不有功至大而若虛自頃宏益時
政發揮王道萬事必理一心從乂以觀其獨伯起慎於四
知常得其貞叔教謹於三省故能深而不竭久而彌芳宣
大號於紫宸潤昌圖於清禁我憑柱石爾作鹽梅正名之
謂羣議斯集可守中書令散官勲封如故主者施行

授劉幽求左僕射制

門下尚書佐理四方取則端揆成務百工是師非允具瞻
孰康庶績封州流人劉幽求風雲元感川岳粹靈學綜九
流文窮三變義以臨事精能貫日忠以成謀用若投水茂
勲立艱難之際嘉話盈啟沃之初存讜直以不回

舊唐書作顧

爲姦邪之所忌釁萌頗露譖端潛發元宰見逐謫人孔多
既殄羣兇方宣大化期問政於經始載登賢於夢卜可依
舊金紫光祿大夫守尚書左僕射知軍國大事監修國史
上柱國徐公仍依舊還實封七百戶并賜錦衣一襲主者

施行

授劉幽求同中書門下三品制

門下弼諧庶政亮采有邦不遇人傑孰膺王佐金紫光祿大夫守尚書左僕射知軍國大事兼修國史上柱國徐國公劉幽求偉量天假守才代出子產之道四既取諸身咎繇之德九以成其用伊昔遭屯感義謀始泊于開泰防萌釁初景化俟其丹青讒詞變於白黑頃居炎瘴受釐之對莫聞重踐台衡從政之言益啟曇茲密勿方聽訏謨宜兼委於掖垣仍具瞻於禮闈可同中書門下三品餘如故主

金匱全集卷二十一
者施行

授王仁皎開府儀同三司制

門下后族之榮況有資敬台儀之重允膺是求特進王仁皎盛門華緒當代賢戚不言而自有陽秋從信而罔愆風雨軒星作範已寵於金穴魯館增輝更芳於玉樹三事斯擬百工式瞻俾延椒臺之祥宜助槐庭之理可開府儀同三司主者施行

授阿史那承獻特進制

黃門建官制爵立化之本樹善崇功惟能是任招慰十姓

兼四鎮經畧大使定遠道行軍大總管北庭大都護瀚海
軍使節度巴西諸蕃國左驍衛大將軍攝鴻臚卿上柱國
興昔可汗阿史那承獻凌鐵關之遠塞威揚萬里雄金山
之舊族誠竭累朝每讀古人之書且多奇士之節豈止嵇
侯忠孝呼韓允緒而已哉頃服獯戎綏其種落茂勲則遠
已寵於登壇厚秩未加俾榮於開府亞台之典羣議允集
可特進餘並如故主者施行

授姚崇兼紫微令制

黃門天之紫微地在清禁宰臣爲重庶政攸先不有殊才

曷云兼寄金紫光祿大夫兵部尚書同紫微黃門三品監
修國史上柱國梁國公姚崇河山粹氣禮樂清英德量在
寬公心益厚詞必體要行之自遠學以窮微志於可大允
茲忠謙光我謀畧聞善若驚欲仁斯至衣冠以爲蓍蔡廟
廟資其柱石朕之欽者管樂人之傑者蕭張遂能以身許
國開物成務邦是用乂朝惟得賢北辰環拱西垣近密俾
因題劖之榮式演如絲之命可兼紫微令餘如故主者施
行

授李林甫特進制

門下王度以貞實寄於良輔天秩有禮允歸於盛德光祿大夫尚書左僕射兼右相吏部尚書集賢院學士修國史上柱國晉國公李林甫應期致用命代生才禮樂形於物範文章表於王佐自登袞職一紀於茲啟沃之謨酌泉源而不竭忠公之節貫霜雪而罔改彝倫攸敘庶績其凝實賴予弼用熙帝載猶且謙沖夕惕兢慎日嚴問溫樹而不言履薄冰而逾勵久而益著德則茂焉近者禮屬交神恩當進秩雖允恭克讓徒有固辭而惟器與名本無虛授宜昭寵數以鎮崇班可特進行尚書左僕射兼吏部尚書主

者施行

授崔日用黃門侍郎制

門下才爲於時以宣可大之業精貫於日以定非常之勛
古稱王佐今乃人傑大中大夫守兵部侍郎兼知雍州長
史修文館學士騎都尉安平縣開國子崔日用果行育德
修辭立誠孝則揚親忠於事主堂堂乎貌暢君子之風謗
諤其言蘊大臣之節故能書讀萬卷文窮四始高步登朝
平心待物日者醜孽未殄嘉謀潛斷臨危不顧見義而作
是用底寧實所繫賴師兵戢矣京兆晏如宜緝台階之政

式拜掖垣之寵可銀青光祿大夫行黃門侍郎參知機務
學士勲封如故主者施行

授張廷珪黃門侍郎制

黃門東西禁掖出納王言精選賢良用存駁正正議大夫
行尚書禮部侍郎上柱國兼判尚書左丞張廷珪文儒秀
士譽諤忠貞汪洋有大雅之風明敏得至公之操言唯及
雷曩歲嘗聞學則臨池當時莫比自厯遷臺省受理綱轄
聲塵益茂聞實攸稱俾登青闈之榮式踐丹墀之列可黃
門侍郎勲如故主者施行

授薛稷中書侍郎制

門下慶傳於家者代濟其美才許於國者時無與讓由是
密勿爲用訏謨所歸銀青光祿大夫行黃門侍郎修文館
學士河東縣開國男參知機務薛稷河汾之英廊廟之寶
相門前社則名優作誥詞塲舊業則譽動飛文公貞性成
仁和道勝坦然之量羣物不干其靜穆如之風九流不測
其度頃罹多難克仗嘉謀翼戴朕躬保寧王室厥功茂矣
朝廷賴焉俾迴踐於綸闈以增輝於鼎席可行中書侍郎
餘如故主者施行

授解琬左散騎常侍制

門下散騎之列豐貂入侍選於耆艾用均師友金紫光祿大夫致仕上柱國解琬文合騷雅學殫經籍百城分按南憲是繩萬里出師西戎即序頃以剖符從政解印歸休章既拜而遂行禮及傳而則往雖風規莫擬而志力猶茂乞言伊屬寧忘賜杖之榮替否旁求宜副安車之命可行左散騎常侍散官勲如故主者施行

授褚無量右散騎常侍制

黃門獻納之任虛求是屬列於侍臣莫匪耆舊銀青光祿

大夫前散騎常侍上柱國褚無量佩服純行周旋雅道夙
侍金華之講屢膺石渠之命故能禮自柔嘉動多忠益頃
在艱罰近終喪禮覃思研精華皓不倦直辭讜議清明可
觀俾重春卿之儒遷居德璉之任可右散騎常侍勲如故
主者施行

授王晙左散騎常侍制

黃門侍臣之任朝廷所重賞善唯速兼才是先銀青光祿
大夫并州大都督府長史上柱國王晙志力堅剛風情慷慨
傳爲書癖成誦在心言應筆精目懸於手受一方之委

惣三軍之令士卒感恩以爭效獯戎滅迹而皆遠功其茂矣朕實休之用憑龍豹之韜更踐貂蟬之位可左散騎常侍兼檢校并州大都督府長史勲如故主者施行

授于經野給事中制

門下尚書兵部郎中上柱國于經野雅量端實閑機密靜有恒其操無擇斯言理必中於繩墨才見推於札翰中臺奏草已承更直之榮左曹顧問宜接雙遊之美可朝請大夫守給事中勲如故

授李懷讓給事中制

黃門朝議大夫尚書兵部郎中上柱國李懷讓直方自守貞獨不羣理可析於毫芒文可成於藻繪雖手揮繁綜而心寄閑遠絲綸所屬嘗推起草之能駁正是司更接遊蘭之寵可守給事中散官勲如故

授柳渙給事中制

勅朝議郎守尚書司門郎中柳渙學思優博禮容莊敬蘊公直之志有廉正之風早以聲華亟從推擇丹墀列侍必選英髦青闈命官宜參顧問可守給事中散官勲如故

授薛稷諫議大夫制

門下中散大夫行尚書禮部郎中修文館直學士河東縣
開國男薛稷奕代雄詞身濟其美光時雅量士慕其風故
能懸帳絕倫升堂覩奧披垣密勿字列黃縑仙闈從容文
飛赤管箴闕之任惟賢是擇俾登才子式寵諫臣可諫議
大夫餘如故主者施行

授吳兢諫議大夫制

黃門朝議大夫前行尚書水部郎中兼修國史上柱國長
垣縣開國男吳兢雅思周密素風清曠著書微婉東觀是
稱起草閑達南宮所重宜列諫臣之位復膺良史之才可

守諫議大夫兼修國史散官勲如故主者施行

授鄭勉紫微舍人等制

黃門朝議大夫守給事中鄭勉措心精覈尤明理體朝議
大夫尚書庫部郎中戴令言屬詞方雅深達政端咸蘊公
忠備聞學行紫闈星拱必佇賢臣青闈雲連實旌奇士閼三
字專文事閼四中散官各如故主者施行

授崔琳紫微舍人制

黃門正議大夫行尚書屯田郎中上柱國魏縣開國子崔
琳素履純懿清心直諒文辭爲從政之端忠孝是立身之

本分符作牧共賴仁明賜筆題工咸推練習披垣近密禁
省旁求宜遷振鷺之行用集棲雞之地可行紫微舍人散
官勲封如故主者施行

授王邱紫微舍人制

勅通直郎紫微舍人內供奉王邱思會風雅文成典謨介

獨爲操直方

闕四字

近其華望自宏

闕二字

青瑣事密黃縑韻

頤歲年籍甚聲聽俾宏詞禁之美宜正掖垣之秩可守紫

微舍人散官如故

授齊澣紫微舍人制

勅朝議郎守給事中內供奉齊澣運心孤邁懷器獨立屬
詞每窮其雅實臨事益表其甄明故能早負聲猷備經推
擇左曹駭議常接於雙遊右掖司言佇光於五字可守紫
微舍人散官如故

授韓休起居郎制

勅朝議郎左補闕內供奉判尚書主爵員外郎韓休理識
清暢襟靈夷雅探學精微屬詞婉麗甲科對策嘗副求賢
左史記言用觀書法可行起居郎散官如故

授賀知章起居郎制

勅朝議郎前行戶部員外郎賀知章業優詞學時重才行
稟精微以高妙體仁恕以明達必能書法不隱立言可觀
宜迴職於版圖併擅聲於鉛筆可行起居郎散官如故

授洪子輿起居舍人制

勅通直郎著作佐郎洪子輿雅淡不羣清貞自遠學探微
旨詞造幽典立心有恒常慕直臣之節書法無隱可稱良
史之才俾列軒墀益光鉛槧可守起居舍人散官如故

授崔銑起居舍人制

勅朝請郎前試通事舍人崔銑識遠心明懷才蘊藝缺碑

盡記亡篋不遺實朝序之英髦爲士林之俊拔趨侍西掖
洽聞東觀期書法以無隱俾舉能而有聲可守起居舍人
散官如故

授許景先左補闕等制

勅奉議郎行揚州大都督府兵曹參軍事許景先詞含風
雅有公直之量宣議郎前國子監四門直講馬利徵學總
典墳粟亨嘉之德士推令聞人假清規致之掖垣用廣賢
路景先可行右補闕利徵可岐州扶風縣丞員外置同正
員仍直紫微省散官各如故

授梁昇卿等拾遺制

勅宣德郎行岐州雍縣尉梁昇卿等或敷暢學旨或該通詞藝爰廣獻書之路用開納諫之門不獨美於雕龍頗思齊於市駿咸宜採擇以申甄辨可依前件

授韋元珪通事舍人制

門下朝散大夫行太子典膳監韋元珪占對閑詳風規韶茂鸞庖分職已命膏梁之緒鸞墀敷奏佇揚賓客之言可行通事舍人散官如故主者施行

授韋振通事舍人制

門下朝散郎前守通事舍人員外置同正員韋振良玉蘊
價明珠耀彩宜擢才於金穴俾趨侍於瑤墀可朝散大夫
行通事舍人散官如故主者施行

授劉知柔尚書右丞制

門下天臺管轄爰正紀綱人望僉宜方膺授受銀青光祿
大夫行尚書戶部侍郎上柱國彭城縣開國男劉知柔時
行推美舊德歸高明暢襟情閑華風表蹈典墳之芳潤總
詞賦之笙簧慮常密於在公迹自勤於爲政萬人登數已
聞書版之精六官揆才更俟彈珠之妙可行尚書右丞散

官勲如故主者施行

授源乾曜等尚書右丞等制

黃門二轄之重百官取則苟非其人何以成務正議大夫行尚書戶部侍郎上柱國安陽縣開國男兼御史中丞源乾曜清深密靜有彌綸之識正議大夫行紫微舍人上柱國倪若水剛正明斷有精覈之才並果行育德以文飾吏事閑達舊章發揮大體南臺執簡動中規模西披揮毫舉成倫要必能主其禁令肅此綱維宜膺鄰詫之寵更叶楊喬之拜乾曜可尚書左丞勲封如故若水可尚書右丞散

官勲如故主者施行

授張仁愿兵部尚書制

黃門名遂身退則聞告老優賢尚齒不忘求舊鎮國大將軍行右衛大將軍上柱國韓國公致仕仍給全祿及品子課朔望朝參張仁原有將相之才樹忠公之績入稱三傑帷幄所以運籌出總六師塞垣由其臥鼓懸利器而御物自中於桑林推素心以得士更成於李徑故能居室而應在邦必聞洎養疾歸休辭榮及禮用旌渭濱之兆空想頬陽之間乞言繫賴寵德攸宜佇增題劒之榮更遂揮金之

樂可光祿大夫行兵部尚書餘如故主者施行

授畢構戶部尚書制

黃門司徒之官實掌邦教常伯之位先求國華銀青光祿大夫河南尹上柱國魏郡開國公畢構達識鴻才調高學贍器無不綜含清明以見微言有可觀負忠讜以居直百郡仰其成績三臺推其故事頃者任殷河尹聲滿洛師姦豪懼秋霜之威孤老懷冬日之愛故可辨於五物書以萬人誰其釐之俾爾作則可守戶部尚書散官勲封如故主者施行

授李乂刑部尚書制

黃門王命司寇汝作士師允迪政刑旁求望實銀青光祿
大夫行紫微侍郎兼檢校刑部尚書兼知制誥昭文館學
士上柱國中山郡開國公李乂恒碣之寶衣冠之華業總
四科才抱九德爲邦理要洞入精微當代詞雄居成準的
忠義得在公之體清修稟行已之用紫泥掌誥雖密王言
黃沙定罪是懸人命眷茲欽恤尤賴簡孚俾迴迹於西垣
宜正名於北斗可刑部尚書學士散官勲封如故主者施行

授劉知柔工部尚書制

黃門司空之職以平水土常伯之任尤重臺閣鴻臚卿上
柱國彭城郡開國公劉知柔碩德耆秀行高才遠文詞有
綺繢之工望實有珪璋之譽出膺賢守則郡國循良入位
名臣則衣冠準的可謂朝之明哲代之純懿俾遷榮於北
斗宜作範於南宮可銀青光祿大夫守工部尚書勲如故
主者施行